

# Marus fauss, enguladitschs da datas ed investiziuns dubiusas

Dapertut s'augmentan cas da criminalitat en l'internet exponenzialmain. La raschun: Igl è simpel e las ristgas per delinquents e delinquentas èn pitschnas. Beat Huonder da la Polizia chantunala dat in'invista en sia laver e dat tips co sa proteger.

LAURA SCHÜTZ/RTR

Actualmain datti adina dapli cugliunarias pertutgant investiziuns en criptomunaida sin plat-tafurmazis dubiusas en il Grischun. Quai di *Beat Huonder*, il manader da la partizun da «cyber crime» da la Polizia chantunala. I sa resultian savens donns fin 100 000 francs. In tal cas vegnia annunzià ina fin duas giadas l'emna a la partizun da «cyber crime». Fin uss haja la partizun tractà circa 400 cas da criminalitat da cyber quest onn.

## Furmas da criminalitat en l'internet

- Cugliunarias sin martgads online
- Cugliunarias d'amur (far finta d'esser inamurà d'insatgi e lura pretender daners en in segund pass)
- Mobing da cyber
- «Sextortion» (metter insatgi sut squitsch cun fotos u videos sexuals da la persuna)
- «Money mules» (dumandar persunas da metter a disposizion lur contos da banca per transfers da daners digitals)
- «Phishing» (enguladitsch da datas)
- «Hacking & Malware»

### Tgi è pertutgà?

Pertutgada è glieud da tuttas vegliadetgnas, quai dependa in zic dal gener dals cas: Da «sextortion» (guarda box «Furmas da criminalitat en l'internet») è plitost persunas giuvnas pertutgadas, da cugliunarias d'investiziuns en criptomunaida plitost glieud vers 50, 60 onns. Persunas privatas vegnan plitost cugliunadas sin martgads online, firmas èn persuenter pli periclitadas da «hacking».

### Tge fa la polizia?

Co che la polizia agescha dependa da cas tar cas. En in cas da «sextortion» per exemplu infurmescha la polizia las paginas d'internet pertutgadas per laschar bloccar il material. Savens vegnan tals videos gisti bloccads sez da las medias socialas. Tar in cas da cugliunaria en connex cun daners da cripto vegni segrìa quai ch'è anc avant maun sin il post da polizia. Lura è la partizun da «cyber crime» vidlonder: Laptop e handy vegnan intercurrids cun programs speziali.

Plinavant vegni era collaurà cun auters chantuns: Las datas vegnan partidas per pudair eruir cas ch'en colliads ed uschia definir ils delinquents resp. las delinquentas. Plinavant dettia ina collaurazion cun ina societat privata che po infurmar bancas sin l'entir mund da bloccar contos, uschia che daners han per part era già pudì vegnir restituïds.

Sper agir en cas concrets fa la polizia era la-vur da prevenzion: Quai cun diversas paginas

## Tips e trics

Quai di il responsabel per tecnologia tar RTR *Gian Reto Derungs*:

- adina esser sceptic
- betg includer infurmaziuns personalas en plebs-clav
- actualisar regularmain ils sistems tecnologics, p.ex. dal telefonin
- verifitgar furniturs sin martgads online – valitazioni dad auters pon esser in agid



**Beat Huonder, il manader da la partizun da «cyber crime» da la Polizia chantunala.**

FOTO RTR

d'infurmaziun, campagnas sin Facebook ed en las medias. Là vegni fatg attent a cas ch'en il moment gisti problematics. Tenor Beat Huonder sentian ins l'effect da quellas mesiras – però mo in curt moment. Suenter circa duas emnas saja tut puspè sco avant.

### Co poss jau ma proteger?

Sch'ins ha in suspect envers ina persuna, cun la quala ins ha contact en l'internet, seja ina bona metoda da pretender in «facetime». Lura na s'annunzian delinquents e delinquen-

tas per part gnanc pli. Tgeninas infurmaziuns pon ins publitgar el internet? Beat Huonder ha in cler avis:

- Tgi che sa chatta davos acziuns criminalas è mintgamai grev da dir. Tuttina èn er delinquents e delinquentas betg cumplettamain anonyms e relaschan fastizs. Per quest motiv saja impurtant da betg stizzar datas sch'ins daventa victima d'in tal cas. Ins duess lura empruvar da restar ruassavel, far in'annunzia e prender agid extern.